

# **PRAVILNIK O IZBORIMA I MANDATIMA**

## **ISLAMSKJE ZAJEDNICE BOŠNJAKA SJEVERNE AMERIKE**

### **I UVODNE ODREDBE**

#### **Član 1. Cilj i svrha**

Ovim pravilnikom se utvrđuju način izbora na funkcije u Islamskoj zajednici Bošnjaka na svim nivoima i mandati članova organa Islamske zajednice.

### **II DŽEMATSKI ODBOR**

#### **Član 2. Izbor u džematski odbor.**

Aktivno i pasivno biračko pravo izbora u džematski odbor ima svaki pripadnik džemata koji ispunjava uvjete predviđene pravilnikom o radu džemata. Izbornu komisiju formira džematski odbor od tri člana sa maksimalno jednim članom komisije iz džematskog odbora. Glasanje se vrši putem listića tajno. Kandidati koji budu imali najviše glasova ulaze u džematski odbor.

#### **Član 3. Mandat u džematskom odboru**

Mandat članova džematskog odbora je dvije godine sa mogućnošću ponovnog izbora.

### **III SKUPŠTINA MEDŽLISA**

#### **Član 4. Izbor u Skupštinu medžlisa**

Članove Skupštine medžlisa biraju džematski odbori. Izbor se vrši nadpolovičnom većinom. Oblasni imam i imami su članovi Skupštine medžlisa po položaju. Ostali članovi Skupštine medžlisa (ako to kriteriji dozvoljavaju) biraju se na osnovu broja članova džemata po sljedećem kriteriju:

1. Džemati do 200 (dvije stotine) članova delegiraju jednog člana u Skupštinu medžlisa
2. Džemati koji imaju između 200 (dvije stotine) i 300 (tri stotine) članova delegiraju dva člana u Skupštinu medžlisa
3. Džemati preko 300 (tri stotine) članova delegiraju tri člana u Skupštinu medžlisa

**Član 5.**  
**Oblasni imam**

Oblasni imam predsjedava Skupštinom medžlisa po položaju. Mandat Oblasnog imama traje sve dok obnaša navedenu dužnost.

**Član 6.**  
**Mandat članova Skupštine medžlisa**

Mandat imama u Skupštini medžlisa traje sve dok obnašaju navedenu dužnost. Mandat članova Skupštine medžlisa iz reda džematlija traje dvije godine, sa pravom ponovnog izbora na maksimalno tri mandata, ili 6 (šest) godina. Član Skupštine medžlisa iz reda džematlija koji je obnašao tu dužnost šest godina može ponovo biti kandidovan nakon pauze u roku od minimalno jednog mandata, ili 2 (dvije) godine.

**IV UPRAVNI ODBOR ISLAMSKJE ZAJEDNICE**

**Član 7.**  
**Izbor u Upravni odbor**

Glavni imam i Oblasni imami su članovi Upravnog odbora po položaju. Skupština medžlisa kandiduje jednog člana Upravnog odbora iz reda džematlija ispred datog medžlisa. Sabor Islamske zajednice Bošnjaka potvrđuje kandidaturu na skupštini Sabora.

**Član 8.**  
**Mandat članova Upravnog odbora**

Mandat Glavnog imama traje sve dok obnaša dužnost glavnog imama. Mandat članova Upravnog odbora iz reda Oblasnih imama traje sve dok obnašaju dužnost Oblasnog imama u svojim medžlisima. Mandat članova Upravnog odbora iz reda džematlija traje dvije godine, sa pravom ponovnog izbora na maksimalno tri mandata, ili 6 (šest) godina. Član Upravnog odbora iz reda džematlija koji je obnašao tu dužnost šest godina može ponovo biti kandidovan, nakon pauze u roku od minimalno jednog mandata, ili 2 (dvije) godine.

**V SABOR ISLAMSKJE ZAJEDNICE BOŠNJAKA**

**Član 9.**  
**Izbor u Sabor Islamske zajednice Bošnjaka**

Džematski odbor imenuje izbornu komisiju od maksimalno 5 (pet) članova za izbor u Sabor Islamske zajednice. Kandidati koji budu imali najviše glasova ulaze u Sabor. Izbor za članstvo u Saboru Islamske zajednice Bošnjaka se vrši na džematskim skupštinama. Svaki džemat izabire svoje članove Sabora po sljedećem kriteriju:

1. Džemati do 200 (dvije stotine) članova delegiraju jednog člana u Sabor
2. Džemati koji imaju između 200 (dvije stotine) i 300 (tri stotine) članova delegiraju dva člana u Sabor
3. Džemati preko 300 (tri stotine) članova delegiraju tri člana u Sabor

#### **Član 10.**

#### **Mandat članova Sabora Islamske zajednice Bošnjaka**

Mandat članova Sabora traje dvije godine, sa mogućnošću ponovnog izbora sa maksimalnim uzastopnim reizborom na tri mandata, ili 6 (šest) godina. Član Sabora iz reda džematlija koji je obnašao tu dužnost šest godina može ponovo biti kandidovan, nakon pauze u roku od minimalno jednog mandata, ili 2 (dvije) godine. Ako je (jedan od) član(ova) Sabora ispred određenog džemata inače imam tog džemata, može biti član Sabora sve dok obnaša dužnost imama u tom džematu.

#### **Član 11.**

#### **Način izbora**

Izbor u sve organe Islamske zajednice Bošnjaka se obavlja pismenim glasanjem, tajno. Članovi izborne komisije trebaju da obavljaju svoju obavezu nepristrasno, u povjerenju, u svojim najboljim mogućnostima, ekspeditivno i praktično. Odluka, akt ili potvrda većine članova izborne komisije je pravosnažna u svim aspektima kao odluka, akt ili potvrda svih članova.